

4.1. SAS LÌTERAS DE S'ALFABETU

4.1.1. LE LETTERE DELL'ALFABETO

Si narant **lìteras** (dae su latinu *litteram* chi in antigòria cheriat nàrrere “tauledda”) totu sos sinnos gràficos chi una limba impreat pro rapresentare cun s'iscritura sos sonos. Cada limba ponet umpare totu sas literas in unu grupu ordinadu chi si narat **alfabetu**, dae su nùmene de sas primas duas lìteras de s'alfabetu greco (s' α = alfa, e sa β = beta).

S'alfabetu de sa limba sarda cuntenet bintiduas literas:

a, b, c, d, e, f, g, h, i, j, l, m, n, o, p, r, s, t, u, v, x, z.

A s'imbesse de sa limba italiana, in s'alfabetu sardu no esistit sa litera **q**, ca su sonu de custa litera est rapresentadu dae su grafema **c** (*cuadru*). Est presente imbetzes sa litera **j** (*maju*), chi traduit graficamente sa **j** frantzesa, che in sa paràula *jour*. Sa litera **h** s'impreat in cumbinu cun *che/i* (*chena*) e cun *ghe/i* (*inoghe*) pro rapresentare su sonu velare; non s'impreat mai in su verbu **àere** (*Deo apo, tue as, etz.*). Sa litera **x**, chi rapresentat in su faeddu meridionale su sonu [ʃ] (*Nuxis*), in Limba Sarda Comuna s'impreat ebbia in sos topònimos e in sos sambenados (*Puxeddu*).